

La ciampèna de la mendranzes: duc la vel, nesciugn la ciola

Co jirerà a fenir? Demò l temp podarà ne l dir...

Sèn Jan - No la é amò ruèda e jà duc se bega. L'è la ciampèna de la mendranzes l frut de la discordia te Fascia. Da canche se n'è sentù rejonèr l'è dut n ferment, l'è batalia anter ombole e cruzie anter i sentadins. E la rejons les é più che una. Una de chestes l'è belapontin l post olà la loghèr.

La veia Aministrazion de Vich aea fat fora che l post ideèl l'è sun Ciaslir ma ades l'ex ombolt se à pissà che, ajache l'è na sia idea e na sia creazion l la vel te mez Vich, per se la tegnir demò te so pasc e no la spartir con nesciugn de etres.

L'ombolt de Comun de Sèn Jan disc enveze che ajache i cogn se la paèr senza l'aer voluda, i vel se la meter ja Poza, zenter del Comun e i la vel ence per na costion naturèla. L paisc de Poza con la termes l'è doventà l paisc per ezelenza de la sanità. La frequenza de 432 Hertz de la neva ciampèna ge dèsc al son gregn efec benefics per la sanità, e donca chest giustifichèa l fat che la cogn per forza vegnir loghèda a Poza. Chest i lo dijea se sà ben Mozart e Verdi, i doi maores compositores de musega de la storia, e donca co se peleg dèr de contra?

Te chesta bega se à ficià ite ence l'ombolt de Soraga (se sà a stèr te ofize de Comun de Sèn Jan no l'è podù se n stèr fora...) che l disc che l post più logich olà meter la ciampèna l'è enveze l Comun de Soraga, ajache l'è jà la "stele" de la mendranzes e chiò apede la stajessa benon, la é ence apede stradon de



La neva ciampèna de la mendranzes.

Fascia, coscita duc la vedessa e i se fermassa per ge vardèr da vejin.

Endèna che i trei la setemèna passèda se à serà ite te ofize de jonta de Comun de Sèn Jan per se la fèr fora, i dependenc cognea enveze se la fèr cà coi sentadins. I telefons chisc dis passè é doventé fersc, la cancelistes no saea più co fèr, ence la ousc registrèda é jita en tilt e medema fin à fat ence l ciampanel de ofize del secretèr. Duc chiamèa cruzié per saer giust cotant fort che l'è l son de la neva ciampèna. "No voi pa doventèr sort – dijea un – jà

la ciampènes che aon ades les sceca da ogne ora", "ma na ciampèna da 800 chili l'arà n batilon granac, chi sà che son fort che la fèsc – dijea n auter"; "ma él vera che la sona 506 outes? Ma siede mac?" dijea amò n auter.

E coscita inant per dotrei dis, valugn se à out ence al piovan de Fascia per ge domanèr se l'èssa podù a zeche vida descomanèr che la sone coscita tanta outes e i à jà dit che i ge scrivàr al Comissarie del Goern per se lamentèr. Adertura va stroz la ousc che rua pa ben ence chi de Striscia la Notizia a fèr fora la costion.

Emben chest biteboi l'è jìt inant per n bel trat e i raprejentanc de Comun someèa che no i saesse proprio co se meter d'acort. Fin che l'è vegnù fora n particulèr che nesciugn saea, che nesciugn sfoi e televijion à mai dit. Su la ciampèna anter la feTURES de Sènt'Ugèna e Sèn Jan Batista l'è "audite, audite": l fregio de l'ex ombolt de Vich. L'è n bel retrat de so vis, grignolent e stolz, anter i maores sènc de la val!

Nos de La Usc di Ladins aon proà a domanèr fora e enrescir la rejon, ma podon ben duc se la feTURER...

Ades nesciugn vel più la ciampèna e ence la Soraintendenza di Bens architetonics de la Provinzia de Trent à cognù ge troèr n auter lech. I à preferì no la loghèr proprio vejin a la geja, ma mingol più fora de anter...

La ciampèna la ruarà te Fascia de jugn e nos pisson che la costion segur no la é amò serèda sù.